

KENYATAAN MEDIA



KEMENTERIAN PERDAGANGAN DALAM NEGERI DAN HAL EHWAL PENGGUNA
No. 13 Persiaran Perdana, Presint 2,
62623 Putrajaya
No. Telefon : 03-8882 5562
No. Fax : 03-8882 5569

KPDNHEP MENGGIATKAN AKTIVITI PENGUATKUASAAN DAN PEMANTAUAN DI KAWASAN LUAR BANDAR

RAUB, 30 Januari 2022 – Kementerian Perdagangan Dalam Negeri dan Hal Ehwal Pengguna (KPDNHEP) sentiasa melakukan penguatkuasaan dan pemantauan setiap hari di seluruh Negara. Pemeriksaan yang dilakukan oleh pihak Kementerian ini bukan sahaja di kawasan bandar malah turut dilakukan di kawasan luar bandar melibatkan pelbagai jenis premis termasuklah kedai-kedai runcit, pasar pagi, pasar awam, pasaraya, kedai serbaneka dan sebagainya.

2. Berdasarkan statistik yang dikeluarkan oleh Bahagian Penguat Kuasa KPDNHEP bagi tempoh tiga (3) tahun kebelakangan ini, pada tahun 2019, sebanyak 12,221 premis telah diperiksa di seluruh Negara dan daripada jumlah itu sebanyak 1,554 premis (13%) diperiksa adalah di kawasan luar bandar. Pada tahun 2020 pula, sebanyak 692,906 premis telah diperiksa dan daripada jumlah itu sebanyak 136,922 premis (20%) yang diperiksa adalah di kawasan luar bandar. Pada tahun 2021 pula sebanyak 865,086 premis telah diperiksa dan daripada jumlah itu 148,430 (17%) premis adalah di kawasan luar bandar. Pada tahun ini sehingga 28 Januari 2022, sebanyak 80,465 pemeriksaan telah direkodkan di seluruh Negara dan daripada itu, sebanyak 12,834 premis (19%) adalah di kawasan luar bandar.

3. Berdasarkan statistik itu menunjukkan bahawa, KPDNHEP tidak mengabaikan aktiviti penguatkuasaan dan pemantauan di kawasan luar bandar meskipun jumlah masyarakat dan bilangan premis di kawasan tersebut tidak tinggi berbanding di kawasan bandar.
4. KPDNHEP menyedari kawasan luar bandar juga perlu diberikan keutamaan di dalam melakukan pemantauan terutamanya bagi memastikan masyarakat luar bandar juga dapat menikmati bekalan keperluan asas seperti gula, tepung gandum, minyak masak, LPG dan sebagainya pada harga yang munasabah dan mudah diperolehi. Jarak perjalanan yang jauh, keadaan geografi dan akses untuk memasuki kawasan luar bandar tertentu yang sukar antara faktor yang menyebabkan bekalan keperluan asas di kawasan luar bandar ini kadangkala mengalami gangguan dan sebagainya.
5. Selain itu, penguatkuasaan dan pemantauan berterusan di kawasan luar bandar ini juga amat penting bagi memastikan peniaga-peniaga di kawasan luar bandar ini juga mematuhi semua perundangan yang telah dikuatkuasakan oleh pihak Kementerian termasuklah isu-isu berkaitan harga, tanda harga, alat timbang dan sukat juga barang kawalan dan subsidi selain memastikan penyelewengan barang kawalan dan subsidi juga tidak berlaku di kawasan luar bandar ini.
6. Pada hari ini, Pengarah Penguat Kuasa KPDNHEP dan pasukan telah melaksanakan pemeriksaan dan pemantauan khas di kawasan Ulu Sungai dan Cheroh di daerah Raub. Hasil pemeriksaan didapati tahap pematuhan oleh peniaga adalah sangat baik kedudukan bekalan barang-barang

keperluan harian juga didapati stabil dan mencukupi bagi menghadapi perayaan Tahun Baru Cina minggu ini.

7. Pihak KPDNHEP juga amat menggalakkan masyarakat di luar bandar untuk menyalurkan maklumat dan membuat aduan sekiranya berlaku gangguan bekalan keperluan asas di kawasan mereka selain salah laku oleh segelintir peniaga yang tidak beretika di dalam menjalankan aktiviti perniagaan mereka di kawasan tersebut.

8. Sekiranya pengguna mempunyai sebarang maklumat berhubung salah laku oleh peniaga boleh melaporkan kepada pihak KPDNHEP melalui saluran berikut:

- i. Whats App 019-279 4317
- ii. Portal Aduan; eaduan.kpdnhep.gov.my
- iii. Call Centre 1-800-886-800
- iv. Emel e-aduan@kpdnhep.gov.my
- v. Ez ADU KPDNHEP
- vi. Pusat Arahan Penguatkuasaan (ECC) 03-8882 6088/6245

Azman bin Adam

Pengarah Penguat Kuasa

Kementerian Perdagangan Dalam Negeri dan Hal Ehwal Pengguna

PUTRAJAYA, 30 Januari 2022

LATAR BELAKANG

Kementerian Perdagangan Dalam Negeri dan Hal Ehwal Pengguna (KPDNHEP) telah ditubuhkan pada 27 Oktober 1990. Matlamat penubuhan Kementerian adalah untuk menggalakkan pembangunan perdagangan dalam negeri yang berdaya maju, berdaya saing, dan berdaya mampan, khususnya di dalam sektor perdagangan pengedaran.

Sektor perdagangan pengedaran adalah antara penyumbang utama KDNK negara dan ia bertindak sebagai benteng kestabilan ekonomi, terutama semasa situasi ekonomi luaran berada di dalam keadaan ketidakpastian. Perdagangan pengedaran perlu kukuh bagi menampun sebarang ketidakstabilan dalam ekonomi negara.

Dalam masa yang sama, Kementerian juga komited dalam melindungi kepentingan dan hak-hak pengguna. Ini termasuk membangunkan ekosistem pengguna dan peniaga yang bersifat melengkapi dan ke arah *self-regulated*, seiring dengan aspirasi ke arah masyarakat negara maju. Ia diharapkan akan melahirkan pengguna dan peniaga yang matang dan beretika dalam mengurusniaga, dan hasilnya adalah negara yang seimbang dari segi ekonomi dan sosial.

Agensi di bawah KPDNHEP :

